



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.


e-mail : tiryimiyim@gmail.com

TAPAK 7 Yangia anidakangma : Tir Yimiyim tir_yimiyim

tir yimiyim **TAPAK 8**

US ozüng yanglurtemi Israel nuclear tashi indang temai adoktsütsü akhanger

Vinesh Phogat Asian Games masayatsü



VOL. XXIII ISSUE NO. 204 (ADOK 204) DIMAPUR ROGONÜ (FRIDAY) MONUPII (MAY) 08, 2026

₹ 5.00

Nagaland nung 'highest income inequality' Longleng district lir

Dimapur, Monupii/May 07 (TYO): Nagaland nung aliba district tem rongnung Longleng district ya 'income inequality' tematiba lir koba Gini coefficient 0.492 aser tajemtiba Phek district, koba Gini coefficient 0.366 alitsü.

Rural areas nung 'highest income inequality' ya Longleng district (Gini coefficient of 0.456) aser 'lowest rural income disparity' ya Zunheboto district (Gini coefficient of 0.330) alitsü. Urban areas nunga Longleng district ya highest income inequality (Gini coefficient of 0.509) liasü aser lowest urban income disparity ya Zunheboto district (Gini coefficient of 0.359) liasü.

Iba ya Nagaland Chief Secretary, Sentiyanger Imchen, IAS-i March 9, 2026 nü sayaba 'Report on Income Disparity in Nagaland' nung tejangja shia lir.

Sorkari Brehostibarnü sangdong ka agütsüba nung, Ministry of Statistics and Programme Implementation (MoSPI), Support for Statistical Strengthening Sub-Scheme indang central sector scheme ka University of Hyderabad den lungjemer inyakba project ka nungi bushitetba lir, ta ashi.

Iba report atema field survey ya 2024 küm October aser December tsüngta agia liasü, aser

date ya 2024 calendar year indang alitsü.

State tesem ajunga nungi sample bendenba ya kilen 4,396 indang lir. Item nungi kilen 1,315 ya urban areas nung survey wards 30 nung agiba nungi lir aser rural areas nung yimtsüng 140 survey agiba nungi kilen 3,080 indang alitsü.

Nagaland ajunga indang Gini coefficient ya 0.46 lir, anungji state nung high income inequality aliba sayur. Tesem ka nung aliba nüburtem tsüngta rongsenketzüng tsütsü telesa aliba asadangba dang Gini coefficient ta ajatsü akok.

Nagaland rural atema Gini coefficient ya 0.42 lir aser urban atema 0.44 lir, anungji jila nung income inequality ya tera agi dang yimdak-yimtsüngtem dang temaba lir.

Income distribution tsütsü tsünglanglen aliba kibong shilem 50-i state indang total income shilem 18 shi angur, ajisüaka temaba shilem pongu kibong tem-i gross income shilem 21 shi angur ta report nung ashi.

Average monthly income dak sendakba nung, temaba shilem pongu kibong temi ita shia income sen 71,028 angur aser tsünglangba nung aliba kibong shilem 50 yagi average monthly income sen 1,639 dang angur, ta report ajanga ashi.

Nagaland nunga May 20 nü pharmacy tem shibangtsü

Dimapur, Monupii/May 07 (TYO): Pharmaceutical trade aser public health nung tebilemtsü tali akumba anema All India Organisation of Chemists and Druggists (AIOCD) ajanga May 20, 2026 nü linük tesem ajunga nung longkak aittsü ayongzüka aliba nung Nagaland tesem balala nung aliba pharmacies tema shilem agitsü.

AIOCD den affiliate süa aliba Nagaland Medicine Dealers Association (NMDA) ajanga sangdong ka agütsüba nung iba bandh ya state tesem ajunga nung anepdang 6:00 ako nungi nikongdang 6:00 ako tashi alitsü ta ashi.

Ozüng alema e-pharmacies lapokba mereprangi senzüka yutsüba, corporate players tulu temi mozü jenjang melenshiba aser Covid-19 mapang sorkari totuyuba agütsüba kar tang tashi amshiba densema mapang talangka nungi tebilemtsü balala aliba anema longkak aittsü ya ayongzüker, ta NMDA-i ashi.

Tazüokba maliba e-pharmacies tem tali akumba ajanga prescriptions tejangja maka mozü ayokba,

prescriptions tim masüba nung amshiba aser antibiotics aser yimya sübatsüba mozü tem melamela anguba lir, koba shiranger asoshi lendong tulu, ta ashi.

Corporate tulu temi mozü jenjang kanga sashia ajemtsüba ajanga business environment meshidaki kimdaksür aser linük tesem ajunga nung aliba chemists tila tem asoshi tebilemtsü agütsür, ta aitsü.

Ketdangsür nem tekeraba nung metongshia mera agitsü, shishilempaba yimya shidak amshidaksütsü aser public health den linük nung chemists lakh 12 dak tema aser parnok dak metaloka alirtem takum litettsüsa kumzüka yudaktsütsü asoshi ajungmesotsü nükjidong nung iba bandh ya ayongzüker, ta ashi.

Nagaland nung sorkar aser jurila mozüki aser nursing homes den sendaktepa aliba pharmacies tem emergency medical nungdak peritsütsü mechi iba bandh küboki maittsü.

NMDA-isa district ajunga nung par kübok aliba district chemists aser druggists associations tem dang iba bandh sülen anidaktsü ayongzüker.

14th NLA nung Daochier I. Imchen züngsem kumogo



14th Nagaland Legislative Assembly nung züngsem ka ama May 7, 2026 nü Doachier I. Imchen tenangzüktep agiba mapang tangokba noksa nung Speaker, NLA, Sharingain Longkumer den Dy. CM Y. Patton aser dangartem angur.

Dimapur, Monupii/May 07 (TYO): 14th Nagaland Legislative Assembly nung züngsem ka ama Doachier I. Imchen den tenangzüktep sentong ka Speaker's Chamber, Nagaland Legislative Assembly,

Kohima nung May 7, 2026 nü agiogo.

Daochier I. Imchen atema oath of office ya Speaker, Nagaland Legislative Assembly, Sharingain Longkumer-i Deputy Chief Minister, Yanthungo

Patton; Minister, Parliamentary Affairs, K. G. Kenye; Advisor, Fisheries & Aquatic Resources A. Pangjung Jamir aser MLAs Achumbemo Kikon aser Nuklutoshi nungertem lia agia liasü.

NICSE anema NSF-i DGP Nagaland nem takhangba agütsü

Dimapur, Monupii/May 07 (TYO): Managing Director, NICSE (National Institute of Civil Service Examinations) aser pa den külemi inyaker anema kaketshir temi ken o benokba nung tang tashi ochi obendang magütsüba atema tebilemtsü akar aser kanga mepelar, ta Naga Students' Federation (NSF) ajanga Director General of Police, Nagaland dangi tezüluba ka agütsüba nung ashi.

2026 nü agütsü. Ajisür mapang talangka oaka tang tashi iba ken o nung terenlok aliba mesüra mera tejangja agiba mangur, ta NSF-i ashi.

Onoki iba ken o süoki ia agir, kechiaser ibai kaketshir aika tarutsü, tejangraba aser meranga aayanga anguba rongsen dak sendakba lir, shirnok competitive examinations atema renemtsü teimla nung iba reju nung tenüng agütsü.

Tai tonglokja alirtem yagi kaketshirtem dang nungi course fees ajunga meshi saka reju indang prospectus nung shia aliba ama educational services shidak magütsü.

Iba sülen centres ya jelia osang kecha magütsüi shibang aser kaketshirtemi fees meyipa

agütsütsü mesüra course tembanga agitsü aiben mepishiaka tenüng atemer telangzüba tai agüja jenshia senzüka yutsü, ta NSF-i ashi.

Ano bushisüngdangba aser ozüng inyakyim nung tanen makai menuba ajanga timtem ajuru alirtem tebilemtsü tali kadaktsür.

Anungji iba ken o tekeratiba nung bushisüngdanga iba maparen tamajung nung shilem agia alir ajunga pua ozüng kübok tapet temerenshi agütsütsü ajungshir, ta NSF-i ashi.

Ozüng nung aliba ama aibelener nem tatishitsü keta tapet temerenshi agütsütsüla. Tim ketdangsüri iba ken o süoki ia agitsü onoki tamang akar, ta NSF ajanga züluba shiti nung shia lir.

RALOA-i CSOs dang Dimapur railway station ken o mebenjatsü ayongzüker

Dimapur, Monupii/May 07 (TYO): Dimapur Railway Station alima den lirumedema yanglushitsü sentong aliba atema nüburtemi ola adokba mapang Brehostibarnü Railway Affected Landowners Association (RALOA) ajanga civil society organisations dang iba ken o mebenjatsü ayongzüker aser tangatettep kati arutsü atema jembishinüba tatem leni arur ta ashi.

station modernisation project nung tetsükdaktsü ajurutsü ta ashiba langzüa iba sangdong ya agütsü.

Brehostibarnü telangzüba ka agütsüba nung, world-class railway station yanglutsü atema NCD-i süoki ia bilemtsüba pela agizüker saka iba lokti ya 'pressure group' ka ama dang alitsüla aser tarutsü nung parnok tetsüng ajemokba ajanga ken o tali benjatsü, ta Railway Affected Landowners Association-i ashi.

Taoba mapang ali kibur temi court nung ken o balala benokba aser iba sülen stay orders agütsüba ajanga kongshia alir aser railway ketdangsürtem tsüngta tangatettep kati arutsü aliba nokdang, aser iba yongji

RALOA tentet, ta parnoki ashi.

Tesüiba küm ana tashi onoki iba ken o amshia central aser state ketdangsür nem tezüluba agüja tim department ajunga den jembishinüa arur, ta RALOA-i ashi.

Iba ken o Nagaland Legislative Assembly nunga jembigo aser iba sülen final approval atema Centre dangi yokogo.

Railway contractors tem tetsükdaktsü kecha majurui maneni ki o jen yangluba mapa inyaktar, aser iba ken o tatemleni arur, ta ashi.

Tejangja ali kibur temia kasa world-class station project aginür aser telok balala dang sorkar den angatettepba inyakyim nung meinprong masütsü ayongzüker, ta RALOA-i ashi.

Sakhabama nung angometsütsü atema training agütsü



Doimapur, Monupii/May 7 (TYO): "New Pond Management Practices" dak sendakba nung training sentong ka May 7 nü Sakhabama nung ayongzüka agiogo. Department of Fisheries & Aquatic Resources, Government of Nagaland-i benoka aliba Extension and Training Programme 2025-26 kübok angometsürtem nem angometsüba yimya balala sayutsü atema iba training sentong ayongzüka agiogo.

Technical session mapang D.F.O Sentinaro-i, new pond management practices indang jembi, kong lai angometsüba resources tajungba amshitsü atema angometsüba indang lemsatap. Laisa, angometsüba nung angometsüba kangabo tajangzü mali, kechiong angometsüba ya kar tzi bongla, kar tema aser kar teyongtsü ta tesem balala nung chimer ta ashi.

Sentong nung shilem agirtem dang angometsüba tziungda tziungda meketa shinü anüksar proktsü aser anogo asem tashi toktsütsü, ta lai ashi. 100x100 feet amala tziungda ali temo taliba kümdaktsütsü aser angometsüba tajungba kümdaktsütsü atema tziungda enoka

angometsüba mepuok tziungda mustard oil cake (MOC), urea aser single super phosphate (SSP) nung meyokteper enoktsütsü, ta ashi.

Laisa, supplementary feeding practices indang metetdaksü, kong lai angometsüba protein tali nungdaker aser angometsüba atuba mapang chiyongtsü composition melenshitsü, ta ashi. Angometsüba dang mapang atakzüka yur (kokra anepdang) angometsüba chiyongtsü agütsütsü, aser tziungda len chiyongtsü proklokttsütsü ta lai ashi.

Maneni Sentinaro-i, tziungda nung organic aser inorganic nutrient mixture tem amshia phytoplankton aser zooplankton renlokaktsütsü kodang tongtibang iba indang lemsatap. Training nung shilem agirtem nemsas angometsüba tashidak koda nokdaksü iba indanga tangazükba agütsü, kong tziungda mongpu melenshiba mapang metsü, shinü, potassium permanganate amshitsüba densema lir. Kasa mapang nung Neikonuo, A.F.I.-i Nagaland nung apetba angometsüba tapu balala indang tangazükba agütsü. Lai Catla aser Silver Carp ya tziungda tema nung chimer, Rohu ya teyong nung aser Mrigal aser Common Carp nung ya bonglang nung chimer ta ashi.

Grass Carp bo tesem ajaklen chimer, ta laisa metetdaksü.

Maneni laisa Paddy-cum-Fish Culture (PFC) indang jembi. Iba inyakyim ajanga aluyimertemi mapang ka nung dang alu ayimba den külemi angometsüba dena metsüteter aser iba ajanga senotsü timba aazükteter ta ashi.

Kohima aser Phek amala district kong tziungda ayimer idaki integrated fish farming ya kanga tapet asütsü. Alu ayimba den külemi angometsüba ajanga shiruru tilater azüoker, ali temo tali kümdaktsü, angometsüba nung senotsü entokba tajemba kümdaktsü aser asen ket nung aliba resource tem tajungba amshitet.

Training nung shilem agirtem dang Catla, Rohu, Mrigal aser Common Carp amala angometsüba ya PFC systems atema tapet, ta ashi.

Training mapang tesem tapet shimtsüba, tziungda koda atutsü, stocking density aser tsüklü ayimba nung angometsüba kodang shilem agir iba indang tangazükba agütsügo.

Sentong ya Fishery Inspector Zakiesiele-i angometsüba yimya sayuba den A.F.I Neikonuo-i ali kodang tendangtsü iba indang sayur tembang. Ajak senteper angometsüba 30 shi-i iba sentong nung shilem agi.

Food Safety Administration, Kohima Zone-i ayongzüka sentong balala agi

Dimapur, Monupii/May 7 (TYO): Food Safety Administration, Kohima Zone, Department of Health & Family Welfare aser Food Safety & Standards Authority of India (FSSAI) Empanelled partner MS Certification Services Pvt. Ltd, Kolkata na longjemer April 23 nung May 2 nü tashi nung FSSAI sentong balala benoka inyakogo.

Under FSSAI Eat Right Campus kübok St. Joseph College, Jakhama, Model Christian College, Kohima, Nagaland Civil Secretariate Canteen aser Directorate of Health & Family Welfare Canteen densema Campus 4 audit süogo. Eat Right School category kübok Government High School, Forest Colony aser PM SHREE Government High School, New Market na audut süogo.

Iba den bendenloksema

BHOG (Blissful Hygienic Offering to God) kübok Mandirs ana, D-Block nung Head Post Office anasa Clean Street Food Hub 1 aser T-Khel shishilembadak Clean Fruit & Vegetable market ka audit süogo.

Maneni Third Party High Risk Food Audits, licensed premises 15 nung agiogo aser Hygiene Rating Audits food premises 30 nung agiogo. Ajak senteper inyakyim 10 aser food premise 45 audit agiogo.

IEC osettem jelia campus aser school tem nem lemsüogo aser audit mapang Food Safety Display Board tem lemja liasü.

Temetetsü kaji FSSAI Registration Certificate/License tem dak alaka chiyongtsü achaayangertem shirnok ket nung mandatory Food Safety Training & Certification (FoSTaC) lir parnok dang audit süogo. Iba

atema training ya taoba mapang department-i empanelled trainer tem ajanga Food Business Operator tem nem agütsügo.

Kasa mapang nung chiyongtsü anepalurtem medical fitness certificate, water report, food grade packaging migration certificate, pest control program amala tongtibang kuli kaketter asadangogo.

Eat Right Initiative Certificate ya küm ana atema agütsü aser iba sülen audit agishir. Hygiene Rating certificate ya asadangba mapang smiley bendenba dak ajemdaker agütsü aser iba ya-a küm ana atema asütsü. Maneni Campus aser School tem shirnoki iba amala kuli kaketer agizüker parnoki Food Safety Administration, Chief Medical Officer Office, Para-Medical, Kohima den tongtepretepttsü.

Tanü Langpangkongtsürtemi chiyongji jaoker

Dimapur, May 07 (TYO): Iba sentong nung Taküm küm Tetsütem kentenertermi Chubatsür, anogomung tenung nung N.K.Naga, Benjongsola, Imti kentenerter den nübertem Pongen aser Eyilobeni jaoka chiyongba sentong ka nungertem asütsü. Iba sentong nung adentsü asoshi tenung agütsü alir kija aser kibong ajaki mamai arua shilem agidaktsüner ta DLWT lenirtemi mepishia ayongzüka lir. metetdaksügo.

Mokokchung DPDB senden May 13 nü amentsü

Dimapur, Monupii/May 7 (TYO): Deputy Commissioner & Vice-Chairman DPDB, Mokokchung, Ajit Kumar Verma, IAS-i sangdong ka ajanga, ita shia amenba District Planning & Development Board (DPDB) senden May 13 nü 11 ako nung tenzüka Deputy Commissioner's Conference Hall, Mokokchung nung amentsü ta metetdaksügo. Anungji züngsem ajak dang iba senden nung jangrabangra arua shilem agütsü asoshi DC-isa mepeshia metetdaksügo.

NBSE-i Compartmental aser Improvement tatidang indang metetdaksü

Dimapur, Monupii/May 7 (TYO): Nagaland Board of School Education, Kohima-i sangdong ka ajanga HSLC aser HSSLC Compartmental aser Improvement tatidang 2026 küm June 9 nung 20 tashi agütsü ta metetdaksügo.

Compartmental aser Improvement tatidang atema temsüa aliba candidate temi NBSE portal-nbsenl.edu.in ajanga May 11 nung May 16 nü tashi nung online ajanga application form tem fill up asütsü, ta kasa sangdong ajanga metetdaksügo.

HSLC atema subject shia taah sen 600 aser HSSLC atema subject shia sen 650 asütsü.

HSLC/HSSLC tatidang nung takok anguba kaketer shirtem mesüra kaketer shirtem shirnok HSLC & HSSLC tatidang ajantetogo, saka subject ka nung tamakok

Tuensang DPDB senden May 7 nü menogo

Dimapur, Monupii/May 7 (TYO): Tuensang District Planning & Development Board, senden May 7 nü Deputy Commissioner & Vice Chairman DPDB, Tuensang Lithrongla Tongpi Rutsa lenisüba nung DC Conference Hall nung menogo.

Taoba senden nung sensaksembatem lepa reprangshiba sülen board-i Saoshong Chipen Society Tuensang züngoksemsü atema sensaksema benokogo. Sensaksemba mapang Dr. Akash Sinha (IPS) SDPO, Tuensang-i district nung tang mozü amshiba aser shibelenba indang metetdaksü aser ashiba agi, district nung mozü takhangba tajemba kümdaktsütsü asoshi department-i inyakdar ta ashi.

Mozü achiba aser shibelenba indang tebilemsü lemsatapba mapang SP, Tuensang Longpoksang Lemtur-i, mozü dak sendakba nung shisatsü peria maliba aser online aser medical store tem nung jenjang dalang agi mozü anguba ya tebilemsü ka lir ta ashi. Anungji pai Arogo, NGO aser lokti tentet balala dang district nung mozü amshiba aser shibelenba aruba azüoktsü atema shilem tuluba agütsü mepeshia liasü. Senden nungsa Dr. N. Wopenthung Odyuo CVO, Tuensang-i, National Livestock Mission (NLM) 2025-2026 kübok Insurance Scheme indang metetdaksü. Maneni DIET Tuensang aser Polytechnic Sedem nati pei department indang inyakyimtem indang power presentation agütsü liasü. DC-isa, World Environment Day nü district nung merekmeju sentong ayongzüksü aser süngtong atemtsü atema Department dang mepeshia metetdaksü. DC-i, PHED aser SP cyber-Crime, Tuensang na dang taruba senden nung department indang inyakyim metetdaksütsü nonglokja liasü.



Jaipur, May 07, 2026: Jal Jeevan Mission (JJM) scheme kübok sen crore 900 dak sendakba ochimashi ken o nung Brihostibarnü Jaipur nung Rajasthan Anti-Corruption Bureau (ACB)-i taoba mapang Minister, Mahesh Joshi apuba sülen tangokba noksa nung angur.

TVK lenir, Vijay-i Angh tanaben ajuruogo

Chennai, May 07 (Agencies): Brihostibarnü TVK tentetsang, Vijay-i Angh, R.V. Arlekar ajurutsü atema Lok Bhavan-i ao aser Congress party teyari agia sorkar akümtsü atema TVK jaoktsü mepishia liasü.

Ano külen BJP-ibo, Angh Arlekar-i temzüng kübok dang inyaksü, ta metetdaksü.

TVK tongti lenir, Vijay Lok Bhavan telungi aiba sülen minute 40 tsüngda meyipa oadok.

Assembly menden 234 aliba state nung TVK-i menden 108 nung takok ngua single largest party kümogo.

Congress party nungi MLA 5-ia TVK pusemsü telemtetba agi, ajisüaka sorkar akümtsü atema simple majority züngya 118 ji mabensar.

Tesülen Lok Bhavan-i

sangdong ka ajanga, "Senden amenba mapang nung Angh-i sorkar akümtsü atema Tamil Nadu Legislative Assembly nung menden peria sayutettsüla ta shiogo," ta metetdaksü.

Angh-i maneni Vijay dang sorkar akümtsü atema MLA 118-i pusemba kuli sayuang ta ashi.

Ano külen TVK tongti, Vijay-ia Angh dang, floor test atema pa renema lir ta ashi.

Osang angazükba agi, Angh-i Additional Solicitor General of India, ARL Sundaresan den shisa lemsatepba sülen sorkar akümtsü atema TVK mejaoktsü telemtetba agia liasü.

Bodhbarnü Vijay-i Angh ajurua sorkar akümtsü atema asüngdanga liasü, ajisüaka nübo peria aliba kuli manguba ajanga Arlekar-i magizük.

Sorkar tenangzükba agitsü aliba dak sendakba nung tasüngdanga ka langzüdang TVK lenir, VS Babu-i, "Repranga dang atadi, iba ya kobi melii ataloktsü," ta ashi.

Ano külen BJP otongdar, Narayanan Tirupathy-i, sorkar akümtsü atema ajakji democratic inyakyim ajanga dang inyaksü, ta ashi.

"Raj (Lok) Bhavan mesüra Angh ratamataba kecha mali. Pai (Angh) temzüng kübok inyaksü," ta paisa metetdaksü.

"Nisungtemi vote agütsüba sasep nung iba ya sayur. Single largest party kati majority mengutettsüsa vote agütsürtemi vote agütsü," ta paisa shisem.

Paisa, "Party kari danga Vijay pusema tejakleni arura Tamil Nadu nung tashitait sorkar ka kümtettsü," ta metetdaksü.

Tetsürtem anema inyakba yimti tamajungtibaji Delhi lir

New Delhi, Monupii/May 07 (Agencies): India nung tetsürtem anema inyakba, teintet sensotem anema inyakba aser bendanger raliwalirtem anema inyakba yimti tamajungtibaji Delhi lir; National Crime Records Bureau (NCRB) indang chart aika nung Delhi ya temaba jenjang nung lir.

NCRB data ya Bodhbarnü sangdonga liasü.

India nung tongtibang yimti 19 nung tetsürtem anema inyakba ken o teimba aliba yimti Delhi lir; 2024 küm kija nung Delhi nung tetsürtem anema inyakba ken o 13,396 liasü. Item ken o nungi ken o 1,058 bo tashiyim amshia tetsür raksatsüba ken otem lir.

Ano Delhi nungsa 2024 küm tanurtem anema inyakba ken o 7,662 liasü, aser yimti 19 nung tanurtem anema inyakba ken o teimbaji Delhi nung lir, ta NCRB-i metetdaksü.

2024 küm Delhi nung tanur/ nisung puer aoba ken o 5,580

liasü aser ibaji states union territories den medem dangra rate teimba lir.

2024 küm kija nung Delhi nung nisung tepsetba ken o 504 liasü aser ibaji tanga union territories den medem dangra Delhi nung teimba lir.

Ano kasa küm Delhi nung teintet sensotem anema inyakba ken o 1,267 liasü aser ibaji union territories aser yimti tulutem den medem dangra temaba jenjang nung lir.

Delhi nungsa 2024 küm bendangertem anema inyakba ken o 64 liasü, aser ibaji NCRB chart temaba jenjang nung lir.

2024 küm gari lenmang nung atalokba lendong teimba atalokba yimti-a Delhi lir. Delhi nung gari lendong 2,000 nung nisung 1,658 asü.

NCRB-i ashiba agi, Delhi nung gari lendong 2000 nungjagi tatalokba 1,521 bo gari agi nisung dak tsüker ajenba ken otem liasü aser tanüngba ken o 479 ji gari lendong tapu balala indang ken otem liasü.

Bengal nung BJP lenir Suwendu indang PA, Chandranath khaset

New Delhi, May 07 (Agencies): West Bengal nung BJP tongti lenirtem rongnung ka aser assembly nung opposition lenir, Suwendu Adhikari indang Personal Assistant, Chandranath Rath mejangjaba nisung kari khasetogo.

West Bengal kübok Madhyamgram nung nisung kari Rath dak injang khaloktsüba sülen pa Diversity Nursing Home-i anir ao, ajisüaka mekümzukteti asü.

Bodhbhar aonung pa meyong gari nung pa Kolkata-i meyipa aoba mapang Doharia anasa Jessore Road nung motorcycle ka nung nisung ana aruba sülen tamasa gari aina nung injang khaloktsü, iba sülen pa dak injang aiben khaloktsür jena oadok.

Kasa tatalokba nungji Rath den külemi mena alir kata injang agi yirua hospital-i anir ao.

Iba tatalokba osang prokba sülen BJP lenirtem aser

züngsemtem aika Diversity Nursing Home kimaji adenshia liasü.

Tesülen Suwendu Adhikari-ia Nursing Home ji semdang.

Iba tatalokba dak sendakba nung tawa takok angur BJP MLA Tarunjyoti Tewari-i, "Onoki yimjung atema ayongzüka arur, ajisüaka TMC-i aibelen tuluka inyakogo," ta ashi.

Trinamool Congress (TMC)-ia iba tatalokba sashia aitsüba den külemi iba ken o ya bushisüngdangtsü atema CBI nem agüjang, ta takhangba agütsü.

TMC-i X ajanga, "Taonung Madhyagram nung Chandranath Rath khasetbaji onoki sashia aitsür, iba denji külemi tang Model Code of Conduct (MCC) benoka liaka tesüiba anogo asem tsüngda BJP-i pusemba nisung tamajungertemi TMC nung inyaker asem tepsetba ya sashia aitsür," ta metetdaksü.

Axis Bank Limited
AC Market Building , 4th Floor , 1, Shakespeare Sarani , Kolkata – 700 071 ;

Hon osettem auction asütsü atema sangdonger

Talisa sen apurtem aser public dang ya sangdonger, tsünglanglen accounts nung nangzüka aliba hon osettem Axis Bank-i tsünglanglen shia aliba Branch nung auction asütsü. Tsünglanglen shia aliba sen apurtemi Axis Bank Limited nem security ama gold ornaments ("Gold Loan Facility") agüja sen apua liasü. Sen apurtem/Guarantors nem Demand Notice agüja Gold loan facility agiba indang sentsüh agüjang ta metetdakja liasü. Ajisüaka sen apurtem/Guarantors-i sentsühji magütsüet nung bank-i pledged gold ornaments, talisa 'schedule of property' nung shia alibatem ya **08-06-2026 anogo nung anüngdang 11:00 ako** nungi "Kong aliar yamaji", "Koma lidir yamaji", "Kechisa lidir ajakji" aser "No Recourse Basis" nung auction asütsüsa akümer. Auction ji yangi agitsü

Sen apurtem aser sentsüh osang tejangja

Customer Name	Loan A/c No.	Amount Outstanding	Date of Demand Notice	Gross weight grams.	Net weight grams.
BRANCH_RAC_NAME 1 LHOMITHI BAZAR NL					
MOONMOON SAHA	XXXXXXXXXXXX4760	418393.42	9/Mar/26	82.900	67.600
SUMAN CHANDRA NANDI	XXXXXXXXXXXX5430	205521.00	16/Feb/26	37.400	34.800
DIPEN NARAH	XXXXXXXXXXXX4849	109190.10	2/Apr/26	12.200	12.000

TENDER INDANG TELATETBATEM
Base/Reserve price ji auction anogo nung tenderers nem agütsütsü, aser iba nungi ajemdaker auction bid asütsü. Bid asütsü atema bank-i agütsüba prescribed tender form nung agütsüba bid/offers dang agizütsü. Bid form/tender nung metokmeperi lira tamagitsü ama züngshitsü aser magizütsü. Tender documents den külemi telatetbatemji tekalen shia aliba branch nungi agizütsüla. Tender document ji ajak renemba sülen **08-06-2026** anogo nung office mapang tim branch official nem agütsütsüla. Anogo süir agütsüba tenders bo magizütsü. Shia aliba osettemji "Kong aliar yamaji", "Koma lidir yamaji", "Kechisa lidir ajakji" aser "No Recourse Basis" nung ayoktsü. Shia aliba osettsüet indang standard, purity/mesüra iba dak sendakba sentsüh aser saru tagütsütsü lira ibaji bank khuret masütsü. Auction anogo nung offers tutsütsü/revise asütsü atema tender agütsürtem, shirnok iba anogo aser mapang nung lidir parnok lia Bank-i tenders lapoktsütsü.

Branch Tenüng Tekalen Shia lir. Auction Anogo: 08-06-2026.
Offer/tender khen agütsürbo ibaji meyipa agitsü makok aser bid asürtemi shimba article/asset/ornament single bid/offer atema bid amount deposit asütsüsa akümtsü. Oset/asset/ornament ka atema bid asürtemji ka dang nungi tali süra, bid asürtem rongnung inter-se bidding alitsü aser teimba bid asürtemji takok angur bidder ta sangdongtsü. Bid asütsüpurtemi KYC documents ajak agütsütsüla, item rongnung- PAN Number, PAN Card, Adhaar Card aser Address proof densema lir. Bid asürtemi E-mail ID & Contact Number tejangja agütsütsüla. Offer agizütsü mesüra magizütsü temedenji Bank dak keta lir. Shia aliba property ayokba dak sendakba nung mangatettep kar danga adokra ibaji Mumbai nung aliba jurisdiction of Courts / Tribunals nung dang benettsü.

Date: 08.05.2026
Place: Kolkata

Authorized Officer,
Axis Bank LTD



May 07, 2026 nü Bihar yimtiba, Patna nung JD (U) lenir aser taoba mapang Bihar Chief Minister, Nitish Kumar'er jabaso, Nishant Kumar-i minister tenangzükba agidang tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, MAY (MONUPII) 08, 2026

Tenüngbo asen, tagitsübo tangar !

Nagaland nung asenok lisopurtem meteta aser memeteti takoxa angubaji asenoki Inner Line Pass (ILP) ozüng junga mamshitetba agi asenoki inyaktetba mapatem ajak bendangertem nem inyakdaksüba aser tenüngbo asen tenüng saka kibur shitakbajibo tzümar, anungji tenüngjibo asen tenüng saka shitakba mapa inyaka tajangzük agirjibo tzümar ta asütsüsa lidaksüba aser inyakdaksüba mapatem ya asütsü. Aji oda, tangalen nungi Nagaland adena aitba süngküm, Nagaland gate, nung ILP miter lir ser nung tzümartem ILP mali ser nung Nagaland tesem ajaklen dokan lapoka dokan kibur akümtsüsa asenoki melaba agi, asen lima nung talir asenok aser tayoker parnok ta, asenok tangutsü aliba ajak agi ita sen terakaji ita atem-matemka item dokan kiburtem keti aoer aser item senji item dokan kiburtem jagi par limatem, kar Assam, kar Bihar, kar Rajasthan aser karbo Bangladesh leni yoker. Aji oda, parnok asen lima nung shishilembaba mapatem inyakba nungi aaba sen jagi parnok lima nung alu tulu ayimer aser kiojen yanglur. Atangji, tzümartem teyari medeni aseni meinyaktetsüba mapa kar lir saka asenoki inyaktetsüba mapatem dena parnok nem inyakdaksüba agi, parnokbo mapa inyaker meinyakba angur saka asenokbo mapa inyaksü mapa kazüteper. Aji oda, asen limaibo bendanger shinga marudaksütsü ta masü saka bendangertemji teimba teimba arudaksütsü merangtsüla saka bendanger arubaji asenok dang nungi parnok nungdak alitsü asoshi arutsüba dak alaka asen den kibur k?ma lia asenok dang asen nungdak ajak ayoktsüsabo marudaksütsüla aser melidaksütsüla. Iba dakji alaka, ano asenok tenüng nung tangar tzümartem takar kümdaksüba mapa kaji, business tapu aika nung tenüngbo asen tenüng saka shitakba teinyakerbo tzümar ta asüba mapatem ya asütsü. Aji oda, tenüngbo Taka Ao saka dokan kibur shitakbajibo Pawan asütsü. Kasaji, jangotsü whole sale ayokba nunga tenüngbo V.Sema saka shitakba kiburjibo Rajesh asütsü. Kasaji, Dimapur Railway station nung süngo amtsük ayokba dokan-tem tenüngji ajak Naga nunger tenüng maloka angutsü saka mena alisang shitakba kiburjibo Ashok, Hazarika, Ali Hussain nungertem asütsü. Iba ama dokan aser business inyaksang tenüngbo asen tenüng saka shitakba kibur aser inyaksangjibo tangar ta asüba meshitak inyakyim dangji 'Benami' ta ajar aser Benami shishilembaba yimya ya ozüngi memelar, kechiyong Benami inyakyim nung inyakerteremji pei aaba nungi yimten nem saru magütsütsü aser lisopur ama tajangzük aser teyari angutsü atema miimshia inyakerterem lir. Ajisüaka, Nagaland nungbo tzümartem inyakba shishilembaba mapatem teimbaka 'Benami' inyakyim nung dang inyakba angutsü. Aji metettsü atema, aseni tzümar dokan ka nung oset ka aliba mapang QR code scanner amshia sen agütsüdang, sen agizükba bank account kibur tenüngjibo Naga nunger tenüng ka adoktsü. Asenoki item ajaki meteta, asen tenüng aser asen temetenji tangar bendanger nem magütsüi asena asen tenüng amshia mapa inyaksü aser tali dang malii tayoka ayoktsüsa asenok dak wainshin, temetetba aser tangatetba alitsüla. Item ajakji shitakba agibo government nung ketdangsertemi ozüng nung shia aliba ama timi inyaka nübortem nem tangatetba agüja anitsüla aser ILP aser Benami ozüng ajak shitak mapa küma inyaksüla. Kodang asenoki shitak inyakdir, khen atemabo asenok akoksar amai asütsü aser nisung aika den tamajunga tentepstü, ajisüaka asen ajangzüksü atema government nung inyakerterem ajaki meshitak dangsa inyakra, asen limaji meshitak lima kümadoktsü. Atangji, tanü asen lima aser nübortem tijji, asenok tenüngbo nokinketer aser takar tular tenüng saka shitakba asen tenüng nung temoatsü aser tajangzük agirtemjibo Pawan, Rajesh, Ashok aser Ali Hussian nungertemji lir. Joko, asenok tenüngbo tangar nem amshidaksür, aser asen temangbo terep dang aser tanelabo tekongraseter ta melii, tenünga asen, mapaa asen aser tagitsüa asen ta ser asen lima aser nübortem asoshi temoatsü küma ali tenzük meshiogo.

OLEMSABANG

TIA MELENSHITSÜR

~ R. Talimoa

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

Khen mapang jila tulu ka nung aiür asangur Kongro Temjenla aser Sangbang Takaba tena kanga dang meimtepa liasü. Tia kar maka tena kibong mekümjungi Temjenla mashisa aküm. Iba osangji Takabai atentena par tsürabur dang ashi. Tia majung Temjenla ya amitsür jala, kibong tepetzük nungi asünung Sb. Takaba tsüraburi khenyongi memelungi kanga ain adok. Tebui Takaba dang ashi "Kr. Temjenlai bena aliba tanur ya ner chir masütsü aser kü semchir rongnunga madentsü, iba O nai mangara na dena kü senmang nung medendaksütsü" ta tebui akang akanga ozüng agütsü. Kechiyong Takaba tsüraburji takar liasü. Sb. Takaba ya tesüngjem, ajemalu aser tsürabur akhüm tsübuba asangur ka liasü. Pai meimla dangi oa aser ashi 'ana alitsü kü tsüraburi memelunger, anungji ana melitetsü, koba ana chir nai bena lir tanur ya ozü chir mekümtettsü' ta shir oadok. Temiemtsü Temjenla mulung zürep tulu agi kongshia kanga ajeb aser lai tetsü dang tatalokba otsü ajak ashi. Iba O ya angashia aoksa-a temeim tetsü süadok. Matong alidak leptok amai Temjenla asoshi shisa rama-a khuret tulu agi mekütbang. Saka lai bena aliba tanurji lai kanga meim nungji lai tanurji kodang asotsü kanga yongyaseta liasü. Mapang tatsüka süir kelen, tanur tebur chanu ka aso. Anungji tanur tenüng ajatsü asoshi Takaba tsürabur dangi oa tanur tebur chanu ka soa lir anungji, jabaso nem tenüng agütsütsü asüngdanga mepishi. Idangji Takaba tebui meit adoka ashi "koba tanur nai soa lir iba tanur ya ozü semchir masütsü ta ni shiatokogo anungji, ni tenüng magütsütsü shiruru tenüng ka jang" ta langzü. La khuret lemsatepdak shinga mali amming nung milen remsep ama tammang tia tulu agi la mekütbang. Saka la mulung süngzük kaji, la tepi ma nung tanur tebur chanu ka mena aliba yong la mulung olushi aser tanur ya kenübo nisung rongnung züngsemdaksütsü ta lai azüngashi. Temjenlai la telidak jila ya toktsütsü lemtet. Lai jila danga ka bushia ao yangji la aahyanga tanur metsütsü lenmang bushi. Tsüngremi tena nem tia tajung ka meküplokja, kenü anogo takar kibong ka nung par atsü mapa inyaka alitsü maongka angu. La kanga pelaseta iba atsü tezülen tena ki tila ka nung lia mapa meranga inyaksü tenzük. Kenü nikongtsütsü kibur kinungtsü tena Temjenlar kidangi arua otsü adong. Temjenla aser tanur tena otsü tatalokba ajak ashitsü tenzük. Iba O angashia kibur mulung kanga raksa aser kibur sang jagi tanubosangji ajunger aru, aser "ne tenüng tanü nungi Sb. Tiajungba ajatsü ni tenüng agütsür. Na kü semchir asütsü, ni na tashi temeteter kümdaksütsü". Kechiyong par kibur ya tanur maliba kibong ka liasü anungji tenati tena semchir ama anepalua kakat Riju tajung nung züngdaksü. Tiajungba ya tesangra ajemalu sempet tajung keta aliba tanur ka inet. Pai kibong tia metetba den tetsü khuret abenba asangur ka aküm. Pai mapa kanga meranga inyakba den kanga nentaka kakat azüng nung kenü pa Doctor aküm. Pa lanuwa mapang tetsü sarasadem nüktzü agi mesütet. Pa lanuwa amungnü Riju nung Tsüngrem temiem angatet pai kechi sentong yangludir, Tsüngrem tama südaksü. Doctor Tiabai sentong yangluba ajak nung Tsüngremi apular aniteter ama ajungkettsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Cru-i World Cup dak sendakba outreach campaign tenzükogo



World Cup 2026 atongtsü mapang ana nung lia Kansas City nung airport telung nung World Cup temaitsü ka sayaba noksa nung angur.

Kansas City, Monupii/May 07 (Agencies): 2026 FIFA World Cup dak sendakba nung Cru-i outreach campaign ka tenzükogo; iba campaign kübok US nung 'host watch parties' ayongzüksü aser World Cup asaya reprangba mapang nung Khristan yimsü dak sendakba nung sensaksemsü atema Khristan 100,000 aser Arogo 10,000 nem training agütsütsü.

"Victory Beyond the Cup" ta ajaba outreach campaign ya Hombarnü sentong ayongzükertemi sangdong.

Iba campaign kübok Khristantemi pei kidang World Cup külemi reprangtsü atema medemertem, kiyongertem aser külem mapa inyakertem jaoktsü, aser asaya tereprangdak mapang nung Khristan yimsü dak sendakba nung sensaksem ayongzüksü.

World Cup ya June 11 nü tenzüksü aser July 19 nü tembangtsü. Iba sentong ya Cru-i Fellowship of Christian Athletes, Alpha USA aser I Am Second organizations den senteper ayongzükter.

Victory Beyond the Cup executive director, Heather Reddy-i, nisung tapu balala longjemdaktsütsü atema World Cup ya maongka tajung asütsü, ta metetdaktsü.

Reddy-i, "Nisung aikati World Cup reprangba mapang nung medemertem den reprangtsü mesüra United States nung aliba yimtittem nung reprangtsü, aser ibaji Khrista osangtajung lemsateptsü atema maongka tajung asütsü," ta metetdaktsü.

2026 FIFA World Cup ya United States, Canada aser Mexico linüktemi senteper ayongzükter, aser alima nung saisapong otsü nung sentong tulutibaji ibai asütsü.

Christian outreach campaign ayongzükertemi ashiba agi, taküm World Cup ya nisung billion 5 dak temai reprangtsüa akok.

Victory Beyond the Cup website nung shia aliba agi, iba outreach nung shilem agia host parties ayongzüksüpurtemi

angati physical mesüra kits meshitsü akok.

Host watch parties ayongzükba ajanga medemertem mesüra kiyongertem tsüngda tesendaktep yanglushitsü atema maongka angutsü aser yimsü dak sendakba nung sensaksemsü atema maongka angutsü.

Tamalen-a Arogotem aser Khristan organizations aikati Olympic Games aser taoba mapang FIFA World Cups nung evangelistic sentong balala ayongzükba liasü.

Taküm küm tetenzüklen Italy nung Milano Cortina 2026 Winter Olympics nunga Southern Baptist Khristantemi Khrista osangtajung lemsatepa liasü.

25buba Winter Olympics ya Italy nung tesem 15 nung

asaya aser terepranger million 2 shi liasü. Olympics asayaba tesem balala nung Southern Baptist noklang aikati International Mission Board (IMB) nungi missionary tem den senteper kanga tasü itta Khrista osangtajung lemsatepogo.

IMB-i "Who Am I?" apologetics campaign ya ayongzükba liasü aser iba campaign ya 2024 Paris Olympics nung tama tenzükba liasü.

IMB team, local partners aser temelungertemi talisa Milan yimti nung Olympics asayaba tesem nung Khrista osangtajung lemsatepogo. Mission team-isa Winter Olympics asayaba tesem balala nung Laishiba den külemi Yohan kakat lema agütsü.

ANOGO ABEN TSÜNGREM DEN

Taidok kü meyong

"Nisung kari kar anema tai agütsütsü lira, nenoki medemer o medemer na talangka arenzükba tai toktepan" Kolosi 3:13

Tekümtet angutsü asoshi tematiba jenjangji temenen taidok angubaji lir. Kari Kibuba Yisu Khristaji kümtetdakba ta amanger, saka tasütsü tonga temenen taidok anguba memeteti lir asür. Tanü azüngba Lai nung temenen taidok angutsübaji asenoki taidok agutsütsü asoshi kodaka bilema lir, iba dak aket ta sayur. Tain makümba Khristan kari asenoki teti taidok nangzükba dak keta lir ta bilemer. Ibaji Lai tesayuba süra, asenoki taidok bushiba nung mapang indoktsüla. Saka temenen shia bilemtettsüji takoktsü asü ?

Kolosi 2: 13 nung temenen ajak taidok agütsüba indang ashir. Asenok temenen taidok anguba indang ashir. Asenok temenen taidok anguba tejangjatiba kuliji ibai lir. Kechiba Tsüngremi taidok agütsür ? Temenen taaji tasüba ta asenoki bilemteter. Khristai temenen taaji pa asüba ajanga ajak küpdang, shirnoki amang ajak nüji kümdaktsü. Khristaji kümtetdakba ta amangba tamang Khrista dak ayuba ajanga, Tsüngremi taochi agi temenen ajak adoker.

Tsüngremi Pai taidok agütsüba mebiletettsü shimtet. Asenoki temenen bilemteta ali tashi tetsübu temenentem asenok nem bilemtetdaktsütsü meranger. Taidokji Khrista dak amangba tamang nung amendaker kenyongi adoker.

Tanur raksaba clinic anasa sayutsüngiba atema pastor ka aitsü



Clive Johnston

May 07, 2026: Taoba mapang Pastor, Clive Johnston-i abortion clinic 'safe access zone' temzüng alema inyakogo, ta ketdangsertemi pa aitsü.

Tanur raksaa indoktsüba clinic ka anasa Johnston-i Yohan 3:16 Lai nung ajemdaker sayutsüngia liasü.

Brihostibarnü Nothern Ireland nung Coleraine Magistrates nung ken o angadangba mapang nung district judge kati arrshi küm 78, Clive Johnston aitsüogo.

Abortion Services (Safe Access Zones) Act kübok Arrla ana nung pa aitsüogo.

2024 küm July ita nung

Coleraine nung aliba Causeway Hospital kima pai moapu nung tekülem sentong ayongzükba sayutsüngia liasü.

Pa dang senchi-a pound sen aika chiogo, ta The Christian Institute-i metetdaktsü.

Pastor Johnston ya taoba mapang Association of Baptist Churches in Ireland nung Tir inyaka liasü. The Christian Institute teyari ajanga pai iba obendang anema temepishiba ken o agütsütsüa akok.

Iba obendang agütsüba sülen pai, "Ni nisung shinga anema meinyak. Iba ya Khristan temeden atema tanak anogo ka lir," ta metetdaktsü.

"Onoki hospital ka anasa Deputy Director, Simon moapu nung Amongnü tekülem Calvert-i, "Yohan 3:16 Lai ya sentong agia liasü. Tanur janngatemtsüka, nungtugu Lai raksa-a indokba onük dak sendakba nung onoki kecha mejembi. Ajisüaka buffer zones ozüng ya kanga tulu, ibayongji Amongnü tekülem sentong agiba-a ozüng alema inyakba züngshio. Arrshi küm 78 mapang nung tang mezüng ozüng alema inyakba ken o nung ni aitsüogo," ta pai metetdaktsü.

Paisa, "Nisung kari timtem agütsüra, rara adokdaktsüra mesüra kar anema inyakra parnok pua parnok anema ken o akatsüla. Ajisüaka ni item mapaji ka danga meinyak, aser iba kuliji police video nunga angutsü," ta metetdaktsü.

Nisung aikati Yohan 3:16 ya kanga meimer, aser iba Lai tekong nung yamai zülua lir, "Tsüngremi alima oda meim nung Pai Pa ajaso chir agütsü, aser shiri pa dak amangdir mesamatsü saka tatem maka taküm alitsü."

Court nung Pastor Johnston anema ken o anga metenzükba mapang The Christian Institute

Deputy Director, Simon Calvert-i, "Yohan 3:16 Lai ya janngatemtsüka, nungtugu Lai tekong ka, aser iba Lai tekong nung tanur raksaa indokba indang kecha shia mali, ta ajaki meteta dang lir," ta metetdakja liasü.

Calverti-isa, police aser ama züngshio. Arrshi küm 78 Public Prosecution Service-i tera tali inyakogo, ta ashi.

Khrista osangtajung sayutsüngibaji tanur raksaa indokba anema ta mezüngshitsüla, ta pai ashi.

"Iba linük nung Khrista osangtajung lemsateptsü atema temeden lir, ibayongji onoki iba ken o ya agizükogo," ta paisa metetdaktsü.

"Amongnü anogo ka nung hospital ka anasa Pastor Johnston-i 'Tsüngremi alima kanga meimba' indang sayutsüngiba atema pa anema ken o benokba ya taoksatsüka lir. Iba ya yimsü temeden nokdangtsü atema lir, kechiyong iba lima nung akhidang nungi moapu nung Khristan kenten sentongtem ayongzükba agia arur," ta paisa metetdaktsü.

AO OSHI ANGAZÜKDAK:

TANÜ ANGAZÜKTSÜBA OJANG



Yangtepnü

(n) hapta nung anogo pungonübuba (Thursday)

* Yangtepnü anepdang shia tetsür sentep akar.

Yangyang

(n) yangyang ta asaba takümsangnu ka (type of singing insect, cricket)

*Joko tang nungi arem nung yangyang asaba angashitsü.

OLONG PAITEP # 7497

Grid for OLONG PAITEP # 7497 with numbers 1-16 in various positions.

TIPIEN

- 2. Auonungchiyongsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüing
3. Tenarong maten
4. A _ _ _ g
6. Mopung apodoka
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 7496 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Miitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER



Bhuvneshwar Kumar-i alizüing tasen ka tongteta pa ya Indian Premier League nung asaya 200 asayaba mezüngbuba fast bowler kümogo.

Assam Chief Secretary-i sorkar tenang-züktepba agitsü atema renemshiba asadang



Assam Chief Secretary-i sorkar tenang-züktepba agitsü atema renemshiba asadang sentong nung tangokba noksa angur.

Guawahati, Monupii/May 7

(Agencies): Tawa shimba NDA sorkar taenba tenangzüktepba agiba sentong atema renemshiba asadangtsü asoshi Assam Chief Secretary Ravi Kot-i ayongzüka lepa reprangshiba senden ka menogo.

Tenangzüktepba agiba sentong ya May 12 nü Veterinary Field, Khanapara, Guwahati nung agitsü renema lir.

Sentong nung Ato Kilonser Narendra Modi, Union Minister tem, BJP-i yimsü asüba state

tem nungi Chief Minister aser Deputy Chief Minister tem aser iba den industry balala nungi lenirtemi shilem agitsü imlar.

Senden ya Kota lenisüba nung agi kong Director General of Police-ia shilem agia liasü. Ato Kilonser Narendra Modi-state semdangtsü aliba aser Council of Ministers tasenba tenangzüktepba agitsü aliba dak rangloker iba senden menogo.

Security, gari senzusenpong azioktsüba, sentong agitsüba tesem renema toktsütsüba, inyakyim shitak benoka inyaktüsü

asem department balala tsüingda sendaktepa inyaktüsü asoshi sensaksem agia liasü.

X nung post ka ajanga Kota-i ashiba agi, administration-i department ajak dang inyakyim sülen shitak anidaka maparen tem benoka inyaktüsü aser department tem ajak kanga junga sendaktepa inyaktüsü tetuyuba agütsüogo.

Paisa, department ajak dang, iba sentong ya kecha tetsükdaktüsü makai agitsü atema kanga junga renemtsü metetdaktüsüogo, ta shisem.

Jal Jeevan Mission 2.0 atema Mizoram-i tenangzüktepba yanglu

Aizwal, Monupii/May 7,

2026 (Agencies): Mizoram aser Ministry of Jal Shakti kübok Department of Drinking Water and Sanitation na tsüingda Jal Jeevan Mission (JJM) 2.0 tenzüksü atema Bodhbarnü New Delhi nung Memorandum of Understanding (MoU) ka nung sign sütepogo.

Union Jal Shakti Minister C. R. Paatil-i iba sentong nung pa indang office nungi virtually aden aser Mizoram Chief Minister Lalduhoma den state Public Health Engineering (PHE) Minister Lalnilawma aser tanga ketdangsürtem Aizawl nungi video conference ajanga iba sentong nung dena

liasü.

Tenangzüktepba nung Mizoram sorkar tenüing nung PHE Secretary Zodingpuü-i aser Department of Drinking Water and Sanitation nungi Joint Secretary Swati Meena Naik nati sign süa liasü, ta ketdangsürtemi ashi.

Sentong nung virtually o jembiba mapang Chief Minister-i ashiba agi, Jal Jeevan Mission mezüngbuba state ajanga nung ayimjema inyakba state tem rongnung Mizoram-a mezüngpur lir. Iba inyakyim kübok kibong 133,060 nem ki tonga tzü line bener otsüogo.

Paisa, state nung school aser Anganwadi Centre tem

ajak iba scheme yagi ayimjema inyakogo, ta metetdaktüsü.

Ketdangsürtemi ashiba agi, tzü supply project agizüker aliba 852 nungi 849 bo tembanga inyakogo, koba shilem 99 tembanga inyakba asütsü.

State-isa, iba sentong kübok tzü tendangba laboratory 28 amenokogo, ta metetdaktüsü.

Lalduhoma-i JJM 2.0 atema tenangzüktepba yangluba ya pelashishia agizükogogo aser ashiba agi, iba ya "Viksit Bharat," nükjidong atongtsü atema tongtibang takok ka lir. Paisa, Centre dang 2024 küm December ita nungi iba scheme atema senotsü magütsü alibatam takaraba nung agütsütsü mepeshia metetdaktüsüogo.

Manipur: Drone agi Kamjong district amak



Imphal, Monupii/May 7

(Agencies): Myanmar den arrtsü nung aliba Kamjong district nung May 7 anepdang telungpurtem asütsü ta temulung melemi bilemertemi yimtsüngtem maka, tensa mejungi kümdaktüsüogo.

Source temi ashiba agi, telungpurtem yagi anepdang züingia 2 ako shi nung Namlee Market aser Choro yimtsüng maka liasü.

Iba tesem ana ya KNA-B

züngsemtemi amak asütsü ta temulung melemi bilemer. Parnoki drone tem amshia amak asütsü ta bilemer, aser iba ajanga tang mangatettep adoker aliba nung tawa tanü amshiba hadirtem amshia raraba agi tebilemtsü tali adokdaktüsür.

Osang ajanga ashiba agi, iba tesem ana nung ki aika rongtoktsüogo, ajisüaka osang agütsüba mapang tashi nung nisung asüba osangbo kecha maliasü.

Security force temi tensa kanga junga asadangdar aser iba lendong nung takoksa ajangshiba asadangba mapang ka lir. Maneni iba tesem amakertem jangjatsü atema bushisüingdang tenzükogogo.

Manipur nung tang iba arrtsü nung aliba district nung ya tensa mejungi aliba mapang iba lendong ajanga tamajungba kümdaktüsüogo. Ita ishika iba tesem nung maneni raratepa arudar.

Strait of Hormuz tanaben lapoktsü atema US-Iran mulungteper

Tehran, Monupii/May 07 (Agencies): Strait of Hormuz nung America nungeri mokdanga aliba salatsü aser iba yongji iba tongtipang tzi lenmang tanaben lapoktsü United States aser Iran tangatetep kati aruogo ta ashir.

Al Arabiya ajanga ashiba agi, linük anaprongi Brehostibarnü mulungteper. US-Iran rara tetenzüklen Iran-i Strait of Hormuz ya mokdanga alima nung energy supplies nung timtem ajurua liasü.

"Strait of Hormuz tanaben lapoktsü mechi mokdanga aliba lapoktsü tangatetep kati aruogo. Iba sülen strait nung tsükdaka aliba rong tem chiokba angutsü," ta osang ajanga Al Arabiya dang ashi.

Aji masüdüng US Tir Donald Trump-i Iran den tezüngzüktep ka yanglutsü imlar ta shia liasü aser kanga junga jembishinüa arur aser rara yakta tembangsü ta ashi.

Pai "Project Freedom" khen asoshi anena atatsü sangdongba mapang iba o ya ashi. Ajiüsüa iba mapang pai strait mokdanga aliba yabo melapoktsü ta shia liasü.

Trump-i Iran nunger teshimtet lenirtem den jembishinüba nung terenlok tulu lir aser tezüngzüktep tatembangba anasai arur ta shia liasü.

"Project Freedom" ya US mitkari tenzükba inyakym ka lir, koba lenmang nokdangertaolen makai aliba shishilempaba rong tem Strait of Hormuz ajanga anir adokba nung yaritsü asoshi anogo ka tejakdang tenzuka liasü.

Iran-ia US-i agütsüba 14-point memorandum of understanding asadanga mapang lir ta ashiba sülen tang iba osang ya angazüker. Iba framework ya February 28 nü tenzükba rara anentsü nükjidong nung yangluba lir.

Aji masüdüng Reuters-ia, Washington aser Tehran ya 'one-page memorandum' ajanga tangatetep kati arutsü anasa lir ta Pakistani osang ka ajanga ashir, ta sangdonga liasü.

Axios ajanga ashiba agi, iba agreement nungya Iran-i nuclear enrichment inyakym anena atatsü mulungba aser US-i sanctions agüja aliba ajema Iran indang rongsen billion aika soita aliba salatsüba densema lir.

Kasa agreement nungya Strait of Hormuz ajanga rong jajaba nung tenokdanga agüja alibatam ajemtsüba dena lir ta ashir.

Alima nung totzü abenba tongtipang lenmangtem rongnung Strait of Hormuz ya ka lir, aser iba tesem nung military mesüra maritime policy melenshiba ajanga alima tesem ajunga nung kongshitsü.

USözünyanglurtemi Israel nuclear tashi indang temai adoktsütsü akhanger

Washington, Monupii/May 07 (Agencies): United States Congress nung Democrats telok kati State Department dang Israel nuclear tashi indang US sorkari mapang talangka ola madoki aliba anena ola adoktsü akhanger.

Secretary of State Marco Rubio dangi shiti ka yokba nung Democrats temi US-Israel nati Iran den raraba mechi iba indang tali tejangjaba tekeraba nung nüngdaker ta tuteta ashi.

Israel ya 1960s mapang nungi nuclear nok-nü lir südi ta amanger, saka parnoki nuclear mali ama sentongtem yanglua amshir aser kodanga yimjak nung nuclear nok-nü aliba sangdonga mali, ta Washington, DC nung aliba Nuclear Threat Initiative ajanga ashir.

White House-ia mapang talangka nungi iba ken o memetet ama arur, ajiüsüa mapang kar nung temulung melemettsüsa temai adoktsüba lir. Iba yongji küm aika party telemsa makai Israen bhukuma aruaka Congress nung özünyanglurtemi tali ochishia inyakdaksütsü meranger.

"Middle East nung nuclear aliba aser iba rara nung tensa tamajungba akumtsü aser iba ama tensa nung administration indang sentong indang osang tejangja meteta alitsü Congress teinyaktsü lir, ta Congress züngsem 30-i meyongnem agüja aliba nung shia lir. "Onoki

iba osangji mangu südi ta onoki amanger."

"Iba rara nung telok ka indang nuclear tashi ketdangsür temi mejangjaba policy yagi Middle East nung 'nonproliferation policy' tamakoktsü kumdahtsür, kechiaser Iran atema, Saudi Arabia atema aser region nung aliba linük ajunga atema par kidangertem nuclear tashi mejangjai telemtetba agir," ta ashi.

May 4 nü züluba shiti nung özünyanglurtemi Rubio dang, Israel ket nung nuclear nok-nü

komala lir ta asüdüng aser iba indang warheads aser launchers indang osang tejangja meshir.

Parnoki talisa Negev Nuclear Research Center, Dimona nung ranglok, koba Israel indang nuclear sentong tiyongtsü lir ta mapang talangka nungi amanga arur.

"Tang Israel ket nung enrichment capabilities lir na, aser koba jenjang nung?" ta parnoki asüdüng fisible material aser plutonium production indang tejangja meshia lir.

(Maneni tapak 8 nung...)

**OFFICE OF THE
MOPUNGCHUKET SENSO TELUNGJEM DIMAPUR**

Felicitatation

Through this column, the Mopungchuket Senso Telungjem Dimapur (MSTD) would like to convey our heartiest appreciation and happiness in congratulating the following :

1. **Ungnir L Kichu** S/o Mr. Lejemyongdang and Mrs. Temjenmongla, for securing **Rank 8th position** in HSSLC Science.
2. **Tongtinung Longkumer** S/o Mr. Bendangmeren and Mrs. Moasenla, **Subject Topper in Information Technology Enabled Services (ITeS)** in HSSLC.
3. **Dr. Imlisongla Aier**, D/o Mr. Yaryongdang Aier & Mrs. Yabangla Jamir, for receiving the **Nagaland Science and Technology Award 2025 - "Young Scientist Award"**, under the **Nagaland Science Mission** in recognition for her achievements and contributions to field of Science & Technology. And also for being conferred PhD on the **Thesis : Development and Impact Assessment of Improved Biomass Cookstoves in Rural Communities** from Indian Institute of Technology Delhi, 2025.
4. **Nungkumer Lemtur** S/o Mr. Wabang Lemtur and Mrs. Meyila Aier, selected as **Banking Assistant in Nagaland State Co-operative Bank, 2025.**
5. **Subongsuba Aier**, S/o Mr. Wabongba Aier and Mrs. Shiluienla Jamir, selected as **Forest Guard under dept. of forest, Govt. of Nagaland.**
6. **Aosanen Aier**, S/o Mr. Lanuyanger Aier and Mrs. Tiasenla Jamir, selected as **Forest Guard under Dept. of Forest, Govt. of Nagaland.**
7. **S. Temsusenla Ao** D/o Mr. S. Apok Jamir and Mrs. Merangla Aier **Thesis titled : Production, Productivity and Marketing of Spices in Nagaland: A case study in Peren and Chiümoukedima district** from St. Joseph University Chiümoukedima.

The Union further wishes them the best in their future endeavors and may the Almighty God continue to use them for his glory.

President Mopungchuket Senso Telungjem Dimapur	President Ao Temlungtsür Telungjem Dimapur	President Mopungchuket Ait Laishir Telungjem Dimapur
--	--	--

ALI AYOKER
ERALIBIL (Dimapur)
Yimsem Ao Baptist Arogo
Anasa Ali 40,000 sqft
ayoker
@Rs.350/- per sqft.
(Negotiable and No Broker)
Contact: +918974028909

Lenz Travels

**Daily AC Service
From Dimapur ⇄ Mokokchung
Dimapur ⇄ Mon
Dimapur Counter No. 8731912892
Mkg Counter No. 8414944634
Mon Counter No. 9612553288**

Mulungnen O



20/06/1955 - 02/05/2026

Onoki teti meima aliba **Asür Longritangchetba Chungmir** (Watiyim village) ajungbena akumliir wadang tembangba mapang ozü den nübu, rongsen, shisatsü aser tamang sarasadem agi yariteper ajak dang ozü mulung ajunga agi pelaba lemsateper.

Onoki nenok kija shia dang ozü tepela melemsateter, ajiüsüa Tulusang Tsüngrem-i nenok ajak mulamushia moajang ta onoki sarasademtsür.

~ Temeim Kinungtsü aser Kinungertem.

ASÜR MOKOKSANGLA




08.05.2025 - 08.05.2026

Oja na onok nungi pilar tanü küm ka jungaka chirnur semchir aser kinunger ajaki nü temeim aser nü tamang sarasadem onok mulungjang nung teti na bilemteta menungra sarasadema amonger.

~ Temeim Chirnur aser Semchir.

**OFFICE OF THE
ALONGKIMA WATSU TELEN**
P.O. MANGKOLEMBA: DIST. MOKOKCHUNG
TENÜNGSANG AGÜTSÜR



Mr. Lt. Arenjenba Aier aser Mrs. Shilukokla, tena jabaso **Shri. Supongnukschi IFS**, pai Environment Forest and Climate change Government of Nagaland kübok Additional Principal, Chief Conservator of Forest jenjang nguteta konang nüngsang tulu bener arutsüba asoshi Alongkima Watsü Teleni Kanga pelar aser tenüngsang agütsür.

Maneni tarütsü anogotem nung ne sempet tajung alima asoshi ajungketa amshiangma aser Tsüngremer temoatsü teti ne den lidakjangma.

Sd/- Wt. Watijungla President Alongkima Watsü Telen	Sd/- Wt. Toshienla Secretary Alongkima Watsü Telen
--	---

**Office of the
AOER JAMIR MUNG DANG**
H.Q. Mokokchung, Nagaland, Pin - 798601

SANGDONGER

1. LONGJAKREP SEMCHIR TERA (LIREM KAKET), 2023 adok page No. 6 nung Imsenperong chir tasembuba Mosem chir 1. Lumongdong, 2. Mongka, 3. Metsübo, 4. Waja, 5. Tamang, ta zülua lir. Saka Mosem chir 1. Lumongdong, 2. Mongka, 3. Metsübo, parnok asem dang jakzük.
2. Page No. 7, Waja aser Tamang kibong makümba agi masü saka Mosem chir masüba agi senmang magütsü.
3. Page No. 63 nung Yongshin chirtem tebur 4 tenüng zülua lir, saka Yongshin dak Kümchu dang jakzük ta kuli agütsür.

Anungji iba nungi Aoer Jamir Mungdangi masetshitsü ta nübur ajak dang sangdonger.

Sd/- T. Meren Jamir, Tir Aoer Jamir Mungdang	Sd/- Yapang Jamir Tongti Zülur Aoer Jamir Mungdang
---	---

Cummins, Hazlewood nung IPL toktsür oa Pak den ODI masayatsü



Monupii/May 7, 2026

(Agencies): Cricket Australia-i parnok asayartem Pakistan den taruba ODI asayamung atema national squad nung maden tsüingda Indian Premier League tembanga asayadaksütsü ta shiogo.

Curicbuzz sangdong ka ajanga ashiba agi, IPL nung asaya aliba Australia nungertem, iba asayamung tatembanglen ya bilateral ODI series den mapang ka nung asayatsü liaka maneni asayadaksütsü.

Cricket Australia aser Pakistan Cricket Board nati May 30, June 2 aser June 4 nü Pakistan nung ODI asaya asem asayatsü sangdongba sülen tang ken o jangjashitsüogo.

Australia nung asayartem May 23 nü Islamabad atongtsü,

koba IPL playoffs asayaba mapang asütsü. IPL final ya May 31 nü asayatsü lir. Australia nungertem tongtibang Cricket asayartem aika tang IPL nung asayadar, kong Travis Head, Tim David, Josh Hazlewood, Xavier Bartlett, Cooper Connolly, Marcus Stoinis, Josh Inglis, Cameron Green, Mitchell Starc aser Matthew Short nungertem densema lir.

IPL league stage ya May 24 nü tembangtsü, aser Australia nungertem asayartem asayaba team tem playoffs atema qualify süra parnok maneni India nung dang alitsü. Sunrisers Hyderabad, Punjab Kings aser Royal Challengers Bengaluru nungertem tang temaba jenjang nung lir aser item team tem ya knockout stage tonga

asayatsü imlar. Franchise balala ketdangsürtemi Cricbuzz dang Australia nungertem densema Bendanger asayartem IPL tembanga asayatsü, ta shiogo.

Pakistan den ODI asayamung atema Cricket Australia-i tang tashi squad sangdonga mali, aser IPL playoff nung tetsüdaksü madokdaksütsü atema ken o asadanger asayartem shimtsü imlar.

Tang asayatsü aliba ODI asayamung ya 2022 küm sülen Australia team Pakistan nung oa mezüngbuba ODI asayaba asütsü. Taküm küm tetenzüklen January aser February ita Australia team Pakistan nung oa T20I asayamung ka asaya, koba parnok 3-0 agi kokogo.

India tetsür team Archery World Cup final-i iogo

Monupii/May 7, 2026

(Agencies): Archery World Cup Stage 2 nung India tetsür recurve team-i Brehostibarnü Olympic 10 ben tashi koker aliba South Korea team koka linük asoshi medal kabosa angutsü jangjaogo. Ajisüaka tebur team bo mezüngbuba round nung Bangladesh mekoki tsükogo.

Tetsür team nung Deepika Kumari, Ankita Bhakat aser Kumkum Mohod nungertem semifinal nung kanga junga asaya-a Korea team ya 5-1 agi kokogo aser parnok Deobarnü second-seeded China den final asayatsü.

Kasa mapang nung tebur recurve team nung Tarundeep Rai, Dhiraj Bommadevara aser Yashdeep Bhoge nungertem 2-6 agi Bangladesh mekoki mezüngbuba round nung tsükogo.

Ajisüaka India tetsür team-i anogo tepeyong kanga junga asaya-a Brehostibarnü asaya asem atonga koka liasü.

Semifinal nung fourth-seeded Indian team yagi asaya kanga junga tenzük aser mezüngbuba set nung 10s nung pezüben tashi khashia 58-55 agi iba set akok.

Tanabuba set nung India team-i 8 nung khen khashiaka 56-56 ta tie ser tembanga parnok 3-1 agi tejakdang aküm. Asaya akoktsü atema poing ana nüngdaka tasembuba set asayaba mapang India tsürtem yagi maneni point 58 angu aser

Korea team-i point 56 dang nguteta parnok straight-sets nung iba asaya koka liasü.

Ajisüaka iba takok ya tajangshiba aikabo bena maliba Korea team ka madak anguba liasü, shirnok taküm Japan nung Asian Games atema renemshiba mapang tang team asadanga mapang lir. Korea team nung tang mezüngbuba asayar Lee Yunji aser Oh Yejin na aser reigning world champion Kang Chaeyoung nungertem densema liasü. Team nung Olympic champions An San o Lim Sihyeon na aser Shanghai World Cup gold medallist Lee Gahyun nungertem densema maliasü.

Brehostibarnü mezüngbuba round nung India tetsür team-i Uzbekistan team 6-2 (53-56, 57-54, 55-54, 55-51) agi koka liasü. Parnok asoshi asaya tasaktibaji quarterfinal nung Vietnam den asayaba ya liasü, koba parnok shoot-off ka sülen 5-4 agi kokogo.

Kasa mapang nung tebur team Bangladesh den asayaba mapang parnok junga masayateti mezüngbuba set 52-54 agi makok aser tanabuba set 54-54 nung tembang. Iba sülen tasembuba set nunga team anapronglai point 53 dang angu, saka set pezübuba nung Bangladesh team nungi Rahman Alif, Ram Krishna Saha aser Mohammed Mishad Prodhan nungertem point 57 angu aser India team-i point 53 dang ngua liasü.

BENDANGLI OSANG :

Tapak 7 nungi...

US ozüng yanglurtemi Israel nuclear tashi...

Israel ya Treaty on the Non-Proliferation of Nuclear Weapons (NPT) nung dena mali aser Congress züngsemtemi, "Israel-i nuclear nok-nü mamshitsü ta administration nem osang tejanga agüja ali mali?" ta asüngdang.

Taoba US ketdangsürtem, Israel miim maparen temai adoktsürtem aser yimjak nung anguba US itdangiter osangtem nung Israel nuclear sentong indang shia lir.

Documents kar nung 1968 küm CIA-i iba mapang US tir inyaka alisang Lyndon B Johnson dang Israel-i nuclear noknü yangluogo mesüra yanglutsü tashi lir ta shia liasü. Tir Richard Nixon-i iba sülen Israel ato kilonser Golda Meir den tezüngzüktep ka yangluba nung Israel-i nuclear arsenal aliba mesangdongtsü mesüra metendangtsü aser iba melen Washington-i meta nungi nungshiba anentsü mulungtep.

Israeli nuclear technician nungi miim mapa temai adoktsür Mordechai Vanunu-

i 1968 küm United Kingdom indang Sunday Times nung Negev Nuclear Research Centre indang kuli agüja liasü.

Rubio dangi züluba shiti nung US ozüng yanglurtemi, public record ajanga Israel ket nung nuclear nok-nü aliba sayur, ta ashi. Parnok 1974 US Special National Intelligence Estimate aser ano US aser Israel ketdangsür temi sangdong balala agütsüba indang tuteta ashi.

Taoba defence secretary nominee Robert Gates densema US ketdangsür temi 2006 küm Senate Armed Services Committee nem takum kuli agütsüdang, alima nung nuclear nok-nü aliba tashi tulu linüktem rongnung Israel ya ka lir ta shia liasü.

Nuclear Threat Initiative ajanga Israel ket nung nuclear warheads 90, plutonium stockpile setet 750 nungi 1,110 (1,700 to 2,400lbs), nuclear nok-nü amshitetba submarines trok aser meta 4,800 nungi 6,500 kilometers (3,000 to 4,000 miles) tongtetba intermediate-

range ballistic missiles tem lir ta asadangteta lir.

Item ozüng yanglurtem yagi taoba mapanga Israel nuclear nok-nü indang tali rakpoka amshitsü ayongzüka liasü. 2019 küm pangzük ka nung Representative James McGovern-i Israel ya nuclear nok-nü aliba linük ka ta züngshia liasü.

Ajisüaka tang ama Congress züngsemtem telong dener US tir ketdangsüba nung iba ama nungshiba yabo tamalen matalokdang.

Gaza nung kin ajunga samatsüba aser US-Israel nati Iran den raraba mapang Israel den Washington tesendaktep tajung aliba indang party anaprongi asüngdanga mapang ka nung ozüng yanglurtemi iba shiti ya zülü.

Trump administration-i iba rara nung tongtipang nukjidong kaji Iran nem nuclear nok-nü meyagludaksütsü ya lir ta ashir. Tehran-i küm aika iba ama nok-nü mebushir ta shia arur.

Vinesh Phogat Asian Games masayatsü

Monupii/May 7, 2026

(Agencies): 2018 Asian Games gold medallist Vinesh Phogat-i tsübua aliba shitak atalokogo, kechiyong Wrestling Federation of India-i Gonda nung asayatsü aliba asayamung ya Asian Games atema selection trial ka masü ta shiogo aser iba ajanga la 2026 küm Asian Games nung asayatsü nokdangogo.

Temzüng ozüng melenshir aliba nung asayartem shirnoki 2025 aser 2026 küm asayamungtem nung medal nguogo, parnok dang selection trial nung shilem agitettsü ta shia lir. Iba ajanga Vinesh sentokogo, kechiyong la 2024 Paris Olympics atema disqualify asüba sülen professional asayamung ka nung danga shilem agia mali.

Wrestling Federation of India-i la domestic circuit-i meyipa arutsü atema nokdangtsü meranger ta Vinesh-i shir liasü. Lai ashiba agi, la National Open Ranking

Tournament atema züngoksemtsü merangba mapang federation-i telangzüba magütsütet.

"Ni National Open Ranking asayamungi meyipa arutsü imla atadar. Iba atema züngoksemtsü asoshi April 30 tashi lapoktsüogo. Ajisüaka ni züngoksemtsü merangba mapang portal shibangogo ta ashi," ta Vinesh-i ashi.

Vinesh-i la tebilemstü lemsatepba sülen WFI-i la tatembangbuba anogo la züngoksemtsü. WFI tir Sanjay Singh-i parnok kecha aibelen masü ta shiogo, aser la züngoksemogo ta ashi, ajisüaka lai ashishiba sülenang ya ataloka liasü.

WFI-i tawa osang agütsüba ajanga Vinesh-i shisabulua bilemba jangjatsüogo. Federation-i 2025 aser 2026 küm medal ngur alirtem dang shimtsü ta shiogo aser taoba mapang takoktem mezüngshitsü ta jangjatsüogo.

BILEMDANGANG

"Metettsü makokba tarutsü atema aseni metetba Tsüngrem dak temulung alemtsü metsübuli."